

SURAT PAULOS KE

TITOS

PENULAU BECAKAP

Titos to' siko' urang te ukai sida' Yahudi te udah jadi agama Kristen, baro' ya ngau kawan kreja manto' Paulos. Surat to' datuju ngusong Titos te tangan nya' adai de pulau Kreta nema ya udah dedudi den uleh Paulos, isa' nguros jemat den. Adai tiga utai te depadah alam surat to'.

Te semaru, Titos de kingat upa kati sifat-sifat urang te tau' mimpem jemat. Utai nya' de padah semaru nema gaya urang te de Kreta mayoh te jat. Te kedua, Titos de kingat kati ya alah ngajar ngenap klompok urang te jadi anggota jemat nya'. Diya' adai klompok urang laki aba' klompok urang inok te udah tuwai te alah ngajar kebala urang te age' muda' ari sida' aba' adai klompok urang muda' aba' kebala pemanto'. Te ketiga, Titos de ajar urang ente' urang Kristen alah ramah aba' gaga bedamai, nang areh ke urang, nang gah blaya', aba' nang nimol utai te nyuroh pecah belah.

Paulos kirem tabe' ke Titos

1 Surat to' ari ku, Paulos playan Tuhan Allah aba' rasol Isa Al Maseh. Ku dautos nulong kebala urang te dapileh Tuhan Allah nguat iman sida' aba' ngajar apa te kena' ke sida' isa' sida' nuna' kedeka' Tuhan Allah. ²Nema kita pecaya' aba' nuna' pengajar nya', kita tau' ngagam jong idop aba' Tuhan Allah sengabot. Tuhan Allah te nadai kala' bula' udah nanyi idop nya' ke kita sebedau dunia dapulah. ³Nyau senta te pas, Tuhan Allah nyuroh Brita Bayek Ya da ketau' urang. Brita Bayek nya' udah de pecaya' ke ku, aba' ku madah pesau nya' nema perintah Tuhan Allah Penyelamat kita. ⁴Titos ku nules surat to' ke meh. Ku udah ngangap meh upa meda' anak ku kedire', nema tua sama pecaya' ke Al Maseh. Ku bradua isa' Tuhan

1:1 Reti ari pemado' ayat to' tau' ga', "ngajar sida' kati te kena' te de ajar agama kita"

Allah Apai kita aba' Isa Al Maseh Penyelamat kita, nganya' pemayek ati Ya aba' mre' idop penoh damai ke meh.

Pengerja Titos da Pulau Krita

⁵Ku nudi meh da pulau Krita isa' meh nguros kebala utai te bedau de uros. Aba' ku ka' isa' meh ngangkat kebala pemimpen jemat de ngenap kuta munyi te depadah ku to': ⁶Pemimpen jemat alah urang te nise' pejah, setia aba' bini dire', kebala anak ya pecaya' ke Isa Al Maseh aba' sida' alah mulah te bayek isa' nise' urang te tau' nudoh sida' mulah utai te nadai senunoh, aba' sida' nadai pedeh deatoh. ⁷Pemimpen jemat nya' urang te nguros pekerja Tuhan Allah, keba' ya alah nise' pejah, nadai sumong aba' garang, ukai pemabok, ukai urang te keran blaya' aba' nadai tama' ke kebala duet. ⁸Uleh pemimpen jemat to' alah urang te gaga nrima' urang bukai de rumah ya, gaga ke kebala utai te bayek, panai, adel, suci aba' tau' ngetat dire'. ⁹Ya alah bepegai teguh ke pengajar te tau' dapecaya', upa te udah deajar ke ya isa' ya tau' ngansak urang nuna' pengajar te kena' aba' isa' ya tau' madah penyalah urang te ngelawan pengajar nya'. ¹⁰Nema udah mayoh urang te meruntak terutama sida' te ngajar uga' urang Kristen alah de sunat, sida' nipu urang ngau umong te bula'. ¹¹Sida' alah datutop mulot nema sida' udah ngacau mayoh keluarga ngau kebala utai te nadai perlu deajar. Sida' mulah piya' bayah ka' ngiga' duet. ¹²Udah adai dulau teh sida' pulau Krita kedire' te deangap sida' nabi, ya udah madah, "Sida' te de pulau Krita gah ngemula', sida' upa jelu te ganas, sida' mulo' aba' luntos." ¹³Apa te jako' ya nya' amat mah. Keba' nya' kingat ke amat uleh meh jemat te adai de krita, isa' sida' bamat-amat pro' pecaya' ke pengajar te kena'. ¹⁴Meh alah ngingat sida' isa' sida' nadai pecaya' age' kebala kisah Yahudi te nadai bamat. Aba' kingat ke sida' isa' sida' nadai nuna' kebala prator urang te udah nudi pengajar kita' te kena' ¹⁵Urang te suci ngangap uga' utai bayek dengau, uleh urang te najes aba' nadai pecaya' ngangap uga' utai najes nadai bayek dengau, nema pemiker aba' ati nurani sida' najes. ¹⁶Sida' nya' madah dire' nglala Tuhan Allah, uleh apa te sida' puluh nunyok ente' sida' nadai' nglala Tuhan Allah. Tuhan Allah gede' ke sida'. Sida' ngai patoh ke Tuhan Allah, aba' nadai talah mulah te bayek.

1:7 Menurot kebala ahli Alkitab pemimpen jemat aba' "penilik" (TB) alam ayat 5-9 urang te sama.

Te alah dapulah kebala urang tuwai, pemuda' aba' pemanto'

2 Uleh meh Titos, meh alah ngajar pengajar te kena'. ²Ngajar kebala urang laki te tuwai, isa' sida' talah ngetat dire', sida' patot darega urang, aba' panai. Iman sida' alah kuat, sida' alah ngaseh urang ngau cara te kena', aba' alah tan ngadap pemedeh. ³Padah ke ga' ke urang ino' te tuwai, isa' sida' idop patoh ke Tuhan Allah, isa' sida' nadai mejai' urang bukai, aba' ukai pemabok. Sida' alah ngajar cara idop te kena'. ⁴Nema ngau cara idop te upa nya' sida' tau' ngajar ino' te age' muda' ngaseh laki aba' anak miyak sida', ⁵panai aba' idop kudos, rajen nguros rumah tanga', bayek ati, aba' patoh ke laki dire'. Sida' alah mulah uga' nya' isa' urang nadai mejah pengajar Tuhan Allah te udah kita trima'. ⁶Upa piya' ga' meh Titos, meh alah ngajar kebala urang laki te muda' isa' sida' talah ngetat dire'. ⁷Alam uga' utai te meh puluh, meh alah jadi teladan mulah utai te bayek. Ente' meh ngajar meh alah jujor aba' bamat-amat. ⁸Aba' uga' apa te meh ajar kah alah kena', isa' apa te meh ajar kah nadai dapejah urang. Nya' nyuroh kebala urang te ngelawan meh malu kedire', nema sida' nitau' becakap tentang te jat ke kita. ⁹Kebala pemanto' te udah pecaya', alah patoh, aba' alah slareh brusaha nyuroh ati tuan sida' gaga, aba' sida' nitau' ngelawan tuan sida'. ¹⁰Nang sida' encuri kebala utai te daempu tuan sida', aba' sida' alah tau' nunyok dire' urang jujor aba' setia. Ente' sida' mulah te bayek upa piya', idop sida' nya' ka' nyuroh pengajar tentang Tuhan Allah Penyelamat kita tau' depuji urang.

Pemayek ati Tuhan Allah nyelamat ensia

¹¹Kita idop upa nya' nema Tuhan Allah udah nganya' pemayek ati Ya ke kita. Pemayek ati Ya nya' nyelamat uga' ensia. ¹²Pemayek ati Tuhan Allah nya' mah te ngajar kita isa' nadai age' idop ngelawan peneka' Tuhan Allah aba' nadai idop nuna' peneka' dunia to'. Kita deajar isa' idop alam dunia to' alah talah ngetat dire', adel aba' setia ke Tuhan Allah. ¹³Kita idop upa nya' bluma' nungo' senta ari te nyuroh gaga te kita agam ke nya', senta nya' dunia ka' meda' lampar besai sinar kuasa Isa Al Maseh, Ya mah Allah te Ma Besai aba' Penyelamat kita. ¹⁴Ya udah nyerah dire' nyelamat kita ari kebala utai te jat aba' mreseh kita ari dusa isa' kita jadi urang te daempu Ya te ransak mulah te bayek. ¹⁵Ajar kah uga' nya' aba'

ansak ke sida' isa' sida' mulah uga' nya'. Meh tau' mulah piya' nema meh adai kuasa ari Tuhan Allah, keba' nang ngenga' sida' menadai meh.

Pesau te pemado'

3 Kingat kah kebala jemat meh, prati kah sida' isa' sida' tunok ke pemerintah aba' pemipen te bekuasa, aba' patoh ke printah sida'. Sida' alah slareh siap mulah te bayek. ²Sida' nang mejat pangan, nang blaya' aba' urang. Sida' alah ritak aba' bebasa ke uga' urang. ³Nema kita sebedau pecaya' sige' budu, nadai patoh ke Tuhan Allah, aba' idop tesat. Kebala kedeka' kita te jat mrintah ati kita, idop kita ma jat penoh iri ati aba' slareh areh ke pangan. ⁴Uleh Tuhan Allah Penyelamat kita nganya' pemayek aba' kaseh Ya ke kita ensia. ⁵Ya nyelamat kita ukai tegal kita udah mulah kebala utai te bayek, uleh tegal Ya kaseh bada' kita. Ya nyelamat kita ngau Roh Kudus te meranak kita age', nya' mah te mreseh kita ari dusa, aba' te nyuroh kita boleh idop baru. ⁶Tuhan Allah nadai bejangka' mre' Roh Kudus ke kita ari apa te udah dapulah Isa Al Maseh, Penyelamat kita, ⁷isa' kita jadi anak Tuhan Allah te tau' jong idop aba' Ya upa te kita agam. Utai nya' tau' piya' nema Tuhan Allah ngangap kita kena' de mua Ya. Ya mulah piya' nema Ya bayek ati ke kita. ⁸Apa te udah ku padah ke to' amat kena', meh alah bamat-amat ngajar to' ke sida' isa' sida' te udah pecaya' ke Tuhan Allah bamat-amat brusaha mulah utai te bayek nema nya' mah te bayek aba' beguna ngau ensia. ⁹Nang meh nunga' kebala urang te gah betengek ke utai te nise' reti, aba' betengek kebala kisah asal-usol. Nang blaya' ke kebala Prator Tuhan Allah te datules Musa. Nema uga' nya' nise' guna aba' nadai nguntong urang. ¹⁰Meh alah ngerara kebala urang te nyuroh pecah belah alam jemat isa' sida' bado' mulah te piya'. Rara ke sida' nang lebeh ari dua kale'. Ente' sida' age' mulah upa piya', jaoh ke sida'. ¹¹Meh pesti tau' bada' kebala urang te upa nya' nadai keran mulah utai te kena'. Kebala dusa sida' nya', nya' mah bukti sida' salah.

¹²Ku ka' ngutos antara Artemas aba' Tikikos ngusong meh. Pas salah siko' ari sniko' datai, beburoh ke meh ngusong ku ke Nikopolis. Nema ku udah mutos ka' diyau den slama' rama celap. ¹³Brusaha bamat-amat talau kah Senas urang te ahli alam ukom aba' Apulos isa' sniko' boleh uga' utai te dengau sniko' slama' dejalai. ¹⁴Keba' isa' mah kebala urang kita belajar

ga' mulah utai te bayek aba' tau' mre' apa te daperlu ngau urang idop, isa' idop sida' beguna ke urang bukai.

Tabe'

¹⁵Uga' urang te aba' ku dito' kirem tabe' ke kita'. Padah kah kirem tabe' ku ke kebala kawan kita te sama pecaya'. Engkrema' Tuhan Allah nganya' pemayek ati Ya ke uga' kita'.